

彭澤縣志卷之一

星野

星垣之說始於人皇之別十二辰厥後重黎分職羲和命官至周官保章之司而分星之說益著自春秋左史及歷代史官所載占驗休咎確有明徵易曰天垂象聖人則之又曰觀乎天文以察時變非虛語也然而南北易位東西殊方或地近而星遠或地小而度多說者不能無疑彭邑地屬揚州辰分星紀而牛女參差度數多寡舊說所載並錄而存之俟精於推步者擇取焉志星野

黃帝分星次斗十一度至婺女七度曰星紀於辰在丑

皇

斗江湖牽牛婺女揚州 西漢天文志

吳地斗分野今之會稽九江丹陽豫章廬江廣陵六安臨淮郡盡吳分也 漢地理志

自南斗十二度至須女七度為星紀於辰在丑吳越分野

屬揚州豫章入斗十度又斗牽牛須女吳越揚州九江入

斗一度 晉天文志

吳星紀初起斗九度中斗二十四度終女四度 唐天文志

天市垣二十二星東西各十一星其東垣南第六星屬吳

越又北方南斗六星南星者魁也北星者杓也石申云魁

星第六星至九江 宋天文志

斗四度三十六分六十六抄外入吳越星紀之次 元志

吳分野斗牛在丑自斗三度至女一度屬吳越分揚州 明

史天文志

豫章十三郡皆禹貢揚州之域而九江南康則地兼乎荆
天文斗分野而九江則宿兼乎牛考牛宿本位居丑之次
為吳越揚州之分六星凡七度此王勃所謂斗牛之墟者
乎又云斗六星二十五度為吳之分野南昌入斗八度饒
州廣信同居七度瑞州三度建昌五度撫州六度吉安九
度贛州十二度南康臨江袁州南安俱斗四度而九江則
入牛五度雖分郡甚晰然與九江入斗一度豫章入斗十
度從前諸家又相徑庭矣 江西通志論

九江天文斗牛分野 明一統志

九江入牛五度豫章入斗十度彭蠡入翼十五度 于大吉
天文秘訣

蒙山以東至江南會稽震澤徐揚之州屬權星大別以東
至雷澤九江荊州屬衡星 春秋緯文耀鉤

斗宿總序曰杓尾第六星至九江又曰九江之名不同考
之洞庭爲九江近是

諸說不同晉志以豫章爲斗十度九江爲斗一度以爲
范蠡王詡張良諸葛亮譙周京房張衡陳卓之言皆同
彭澤隸屬九江星野與郡不異說者又謂星紀之次乃
起斗十三度則星紀析木各得斗度之半豫章九江當

入析木之津而史記漢書春秋元命苞唐一行又以豫
章爲越分麗牽牛于大吉天文秘訣亦以爲牛之五度
則是斗牛之分尙無定據夫九江至南昌二百餘里以
爲斗之一度不應差九度至以爲牛五度則愈無據九
江至南康僅六十里不應參差若此南康距南安千三
百餘里中隔南吉贛乃越南昌之八度吉安之九度贛
州之十二度而共四度此又何說也豈昔之九江郡爲
地甚遠境屬江北其度自應有異不知廬江亦在江北
漢潯陽舊屬廬江有以廬江爲斗之六度者則九江不
應入牛度至以豫章爲越分麗牽牛又有以杭州分斗
之五度者此又不可解矣總之天體渾圓而不可分必

據其可分者以分之故歷家隨日月所經卽恆星之大而著者分天爲十二辰二十八舍然後度數可稽日月之食可逆推而得分至啓閉之節可辨乃以閏月定四時成歲以此授時而敬天勤民之道於是乎達蓋歷法分天非分地也自保章氏以星土辨九州而分野之說起卽如其說在天一辰得三十度三十分有奇豫州不滿千里而配大火揚州延袤六千里亦只配星紀天之度無盈縮而地之理有廣狹何不均之甚乎志書例紀星野博採羣書並存衆說以俟博雅君子焉

舊志論

彭澤縣志卷之一終

彭澤縣志卷之二

方輿

沿革古蹟附

疆域

形勝

山川

水利

風俗

彭澤之名見於禹貢著於山海經至西漢以之名縣古矣晉唐以來遷徙不一南唐遷治於小孤江次歷千餘年城郭如故閭閻闌櫛比鱗次謂非地氣效靈歟考其沿革攬其疆域紀其山川形勝五土之沃行戶口之繁滋風俗之淳厚皆於是乎見然則彭地雖不過數百里而寰宇之景象宛於一邑寓之矣志

方輿

沿革

唐虞三代荆揚二州境

彭澤縣志

卷之二

沿革

彭澤縣志 卷之二 四
春秋吳楚地

戰國楚地

秦九江郡

漢高帝六年始置彭澤縣屬豫章郡

李漢南境入吳屬彭澤郡後屬武昌郡

晉永嘉元年析彭澤地置上甲縣屬潯陽郡義熙八年省

上甲入彭澤屬江州

宋齊俱係江州潯陽郡

梁陳梁析彭澤地置太原郡又置晉陽和城天水三縣與

彭澤俱屬太原郡陳因之

隋廢梁所置郡縣并彭澤合爲龍城縣屬江州郡後復名

彭澤縣屬九江郡郡卽江州其縣皆在彭蠡西古彭澤鄉
今分屬湖口

唐置浩州城割彭之西爲都昌彭之東爲樂城後廢樂城
省入彭澤屬江州其鄉有九

梁唐楊吳地有江州彭澤隸之

晉漢周南唐地昇元初割彭澤鄉及五柳之半爲湖口又
割黃菊鄉入東流後遷於小孤江次卽今縣治

宋彭澤縣屬江州

元彭澤縣屬江州路

明彭澤縣屬九江府府卽江州更名

國朝仍舊

彭澤縣志

卷之二

沿革

五

淮海惟揚州彭蠡既豬

尚書禹貢

廬江出三天子都入江彭澤西

海內東經

禹貢彭蠡澤在西因以名縣

輿地廣記

彭澤之名其來久矣蔡九峰云彭蠡地志在豫章郡彭澤縣東合江西江東諸水跨豫章饒州南康軍三州之地鄭道元注水經彭澤今彭蠡也在潯陽彭澤縣史記南入於江東匯澤爲彭蠡孔安國曰水東回爲彭蠡大澤又正義註吳起云三苗之國左洞庭而右彭蠡周景式廬山記亦曰柴桑彭澤之郊古三苗國屬廬江郡歷考前說相沿已遠雖其後有以彭澤名郡者有以彭澤屬別郡者或分或合或廢或置疊

更不一而彭澤以彭蠡澤在西得名則始於禹貢山

海先德化諸縣而名之也

舊志論

春秋屬吳地

十道志

戰國屬楚周顯王三十六年楚威王殺越王無疆盡取其地

府志

吳楚名地非指彭澤一處固合江西一省言之也至

楚取越地一節年分各有異舊府志載戰國周顯王

三十六年楚威王殺越王無疆盡取其地而越世家

注則曰周顯王之四十六年楚敗越盡取故吳地與

府志所載三十六年不合以觀通鑑綱目載楚滅越

乃在周顯王之三十五年又與史記互異而府志所

載於綱目爲近疑亦本諸綱目特字有譌缺抑綱目
四十字卽三十字之譌耶爲舉端以俟知者

舊志論

史記六國年表周顯王三十年楚威王熊商之元年
也楚威七年圍齊於徐州楚世家云七年齊孟嘗君
父田嬰欺楚楚威王伐齊敗之於徐州徐廣註曰時
楚已滅越而伐齊也齊說越令攻楚故云齊欺楚按
楚威之七年乃周顯王三十六年也通鑑綱目想因
史註有楚已滅越之文故列之於顯王三十五年耳
又按楚威止十一年徐周顯王四十年至四十一年
則楚懷王槐元年也周顯王四十六年卽楚懷之六
年安得尙有楚威王乎觀六國表將楚圍齊於徐州

已明列於周顯王三十六年之下則越世家內楚威
王北破齊於徐州徐廣所註周顯王之四十六年四
字當卽三字之訛明矣

舊志知府董榕論

秦爲九江郡

十道志

始皇二十四年王翦滅楚虜王負芻二十六年分天下
爲三十六郡注九江其一也

史記秦始皇本紀

漢爲豫章郡

十道志

高帝元年項羽立黥布爲九江王盡有其地四年分九

江置淮南國改封黥布爲淮南王卽壽春六年淮南置

豫章郡領縣十八彭澤隸焉

府志

豫章郡領縣十八其三曰彭澤

漢書地理志

揚州刺史部豫章郡二十一城其十三曰彭澤

後漢書郡國志

三國南境入吳屬彭澤郡北境入魏屬廬江郡後盡入

吳武昌郡

豫章書

晉豫章郡領縣十六其十曰彭澤

晉書志

惠帝元康元年有司奏荆揚二州疆土廣遠統理尤難

於是割揚州之豫章郡陽廬陵臨川南康建安晉安荆

州之武昌桂陽安成合十郡因江水之名置江州永興

元年分廬江之潯陽武昌之柴桑二縣置潯陽郡屬江

州懷帝永嘉元年又以豫章之彭澤縣屬潯陽郡

同上

永嘉元年析彭澤地置上甲縣屬潯陽郡安帝義熙八

年省上甲入彭澤屬江州江州即潯陽郡更名

舊志

宋齊彭澤小屬江州潯陽郡

府志

晉武帝太康二年以武昌之潯陽復屬廬江郡惠帝永

興元年分廬江武昌立潯陽郡領縣三隸彭澤

宋書志

江州鎮潯陽中流襟帶郡領柴桑彭澤

南齊志

梁置太原郡領彭澤晉陽和城天水平陳郡縣並廢置

龍城縣

隋書志

隋文帝開皇十八年改名彭澤縣

同上

隋置九江郡領縣二潯城彭澤

府志

九江郡即江州其縣皆在彭蠡西古彭澤鄉即今湖口

地

舊志

唐武德四年置江州領潯城潯陽彭澤三縣五年置浩

州又分置都昌樂城二縣八年罷浩州以彭澤屬江州
仍以樂城入彭澤 唐書

武德五年安撫使李大亮擇境內山之高者莫如浩山
因置浩州於山南移置彭澤為附郭縣割彭之西為都

昌彭之東為樂城而統轄之八年州廢樂城省入彭澤
與都昌俱屬江州時彭之鄉有九曰廣泰曰五柳曰彭

澤曰新興曰天水曰太平曰懷恩曰建安曰黃菊 舊志
開元二十一年分江南道為江南東道江南西道置西

道觀察理所管州八洪州饒州虔州吉州江州袁州信
州撫州管縣三十六江州管縣三潯陽彭澤都昌 元和

郡縣志

南唐昇元初自浩州故城移湖西四十里江次即今縣

理 太平寰宇記

保大中以彭澤二鄉析置湖口縣屬江州舊志昇元二

年割彭澤鄉及五柳鄉之半為湖口割黃菊鄉為東流

又并廣泰天水懷恩於五柳合新興建安太平為四鄉

遷縣於小孤江次 寰宇通志

後五代梁唐晉漢周舊志無彭澤隸屬并郡志省志

沿革悉有缺只載入南唐嘗竊疑之及讀永叔五代

史志職方考時有內屬外屬之分內屬者為五代七

十八州為梁一百二十三州為唐一百九州為晉一

百六州為漢一百一十八州為周宋與因之此中國

之大略也外屬者強弱相并不常其得失至於周末
 閩已先亡而在者七國自江以下二十一州為南唐
 彭澤隸焉今按其譜圖則江州等處梁唐屬吳地晉
 漢周悉屬南唐南唐李昇自晉天福二年篡楊溥位
 建國改元至宋開寶八年國滅凡三十九年又考昇
 子景保大四年馮延巳等以邪佞用事御史中丞江
 文蔚劾奏宰相馮延巳諫議大夫魏岑亂政與陳覺
 等同罪而不見貶黜言甚切直景大怒貶文蔚江州
 司士參軍故彭澤原屬江州惟有南唐可攷

舊志論

宋高宗建炎元年陞江州為定江軍江西安撫司領縣

五隸彭澤

府志

江州上潯陽郡開寶八年降為軍事大觀三年升為望
 郡舊隸江南東路建炎元年升定江軍節度二年置安
 撫制置使以江池饒信為江州路紹興元年復為二路
 本路置安撫大使嘉熙四年為制置副使司治所咸淳
 四年移置司黃州十年還舊治崇寧戶八萬四千五百
 六十九口一十三萬八千五百九十貢雲母石斛縣五
 彭澤隸焉

宋史志

元世祖至元十二年置江東西宣撫司十三年改為江
 西大都督府隸揚州行省十四年罷都督府升江州路
 隸龍興行都元帥府後置行中書省江州置隸焉十六
 年隸黃蘄等路宣慰司二十二年復立行省戶八萬三

千九百七十七口五十萬三千八百五十二領司一縣

五彭澤隸焉 元史志

明平陳友諒改為九江府領縣五 嘉靖通志

明為九江府五縣仍其舊隸江西布政司分隸九江道

府志

國朝因之編戶十八里 府志安志作編戶十七里說

彭澤自古無兩名三代迄秦渾為彭蠡未冊為縣豫

章書漢末入吳屬彭澤郡漢書地理志豫章郡領縣

十八而彭澤始見後漢書豫章郡二十一城而彭澤

與焉其後或屬豫章或屬潯陽或屬江州隨時變遷

前說備矣但今之彭澤地惟十八里上連湖口下抵

東流左接建德右界望江宿松廣袤約三百餘里而

山海經則以廬江三天子都入江彭澤西郭璞以為

潯陽彭澤縣是則彭澤屬潯陽時幅員較廣史稱漢

武巡南郡至江陵東登禮潛浮江自潯陽出縱陽過

彭蠡祀其名山大川夫縱陽在彭澤江之北史記言

自潯陽出縱陽則潯陽又在縱陽北矣杜氏通典曰

潯陽縣江北蘄春郡界因知廬江為春秋廬子之國

晉宋以還庸為列郡而潯陽非僅九江之潯陽則彭

澤亦非今之輿圖矣考豫章書漢時南康府為海昏

彭澤二縣地輿廣記星子縣本漢彭澤地元和郡

縣志都昌本漢彭澤地東流亦以為彭澤舊境觀諸

說益信彭澤之隸潯陽者下自皖江上及南康其地殆視今數倍迨至南唐奉化軍始置瑞昌湖口東流三縣宋太宗太平興國三年始陞星子鎮爲縣以東流隸池州尋又以都昌星子隸南康軍而彭澤分晰矣附載於後以識沿革之攸殊云

舊志論

古彭澤縣在縣東三十里漢置晉隋因之唐武德五年改彭澤爲浩州遷於浩山下今彭澤鄉

省志

浩州故城縣治南三十里五柳鄉唐武德五年置浩州以彭澤爲附郭縣築城於此八年州廢至南唐主李昇元年遷縣於小孤江次而城亦尋廢遺址及街砌尙有存者

舊志

龍城廢縣在縣西二里隋平陳後置至開皇十八年又改

爲彭澤縣

太平寰宇記

趙屯城在縣東北二百五十七里典籍不載故老相傳趙

屯城

同上

上甲廢縣在彭澤縣境晉置義熙中省入彭澤

明一統志

古太原郡城太平寰宇記在彭澤東北五十里按顧野王

輿地志太原郡梁武帝立屬潯陽領晉陽天水和城三縣

通志

廢樂城縣在縣南三十九里縣城傍山爲之南北高險東

西平下隋大業十三年賊帥張善安據嶮唐武德五年縣

平屬浩州至八年省州及縣併入彭澤舊志云在陶王山

北浩州廢省入彭澤

舊志

天水廢縣太平寰宇記在彭澤縣東五十里按顧野王與地志天水縣武帝置以擬西水縣隋平陳廢入彭澤

通志

和城廢縣太平寰宇記在縣東北二百二十里按顧野王

輿地志和城縣江左立屬汝南郡齊之廬江南頓亦有和

城屬太原郡至隋平陳併入彭澤

通志

晉陽廢縣太平寰宇記在縣東北壹百九十四里按顧野

王輿地志晉陽縣梁武帝立屬太原郡隋平陳併入彭澤

通志

天水和城晉陽三縣皆梁置屬太原郡隋廢惟天水鄉在

縣東五十里乃天水縣舊治和城晉陽皆在縣東北貳百

里許後當為池州府境

舊志

以上十條歷列古蹟舊志附沿革今仍之

疆域

上游水路由大江通本府湖口縣西達潯陽江西南達鄱

陽湖

下游水路東北達江南池州府東流縣并通下江各省

陸路驛道西達本府湖口縣東北達江南池州府東流縣

東至江南池州府建德縣

縣東壹百里至白洋湖交江南池州府東流縣界由白洋

湖抵東流縣城四十里

縣南山路九十里至蕭家嶺交饒州府鄱陽縣界由蕭家

嶺抵鄱陽縣城一百八十里

縣西大江上游水路四十五里地名下石嘴交本府湖口
縣界由下石嘴水路抵湖口縣城四十五里

縣東北大江下游水路三十五里地名窖子石交江南池
州府東流縣界由窖子石抵東流縣城六十五里

縣東城隅陸路六十里至大泊湖北岸地名鉄尺灣交池
州府東流縣界由鉄尺灣抵東流縣城六十里

縣東南隅山路七十里地名青山橋交江南池州府建德
縣界由青山橋抵建德縣城九十里

縣西南隅稍西陸路四十里地名崇山交本府湖口縣界
由崇山抵湖口縣城四十五里

縣西南隅稍南山路九十里地名武山交南康府都昌縣
界由武山抵都昌縣城九十里

縣前對江西北隅稍西陸路一十五里地名史家營交江
南安慶府宿松縣界由史家營抵宿松縣城一百二十五
里

縣城西北隅稍北水路下游六十里地名沙灣交江南安
慶府望江縣界由沙灣抵望江縣城二十里

自縣治至九江府陸路一百五十里水路同至江西省水
陸路共計四百五十里至江南省八百五十里至京師水
路四千四百二十里陸路三千七百一十里

大約表計一百一十里廣計一百三十里幅員三百五十
里

形勝

長江浚川限帶封城

宋呂祖謙論

盤渦谷轉凌濤山頽

晉郭璞江賦

俯矚大江仰以崇島

李虛已記

海門第一關乾坤孤峙

楊載語

吳楚之鎮畿甸之喉延攬萬里

明世宗御製文

彭澤在江以西最爲下邑當吳楚之界滇黔閩粵之衝

徐士儀序

山形標海日林邊一望九江平樓勢出江炳窗中幾窺三

楚盡

王奉禹疏

江湖襟帶吳楚門戶

形家言

地形峻峙前瞻廬阜之奧區天塹橫陳中接吳楚之聲援

翰苑新書

彭澤瀕江右之尾實爲四方之孔道

李名芳紀實

據彭蠡跨海門砥柱橫江龍城四塞

舊志

去小孤山十里而近其境西南接湖口都昌東北踰馬當

山交望江江右之境盡焉而小孤又江右一門戶云

郭子

章郡邑表說

小孤屹立江心奇險無敵此又大江以西上游之砥柱不

獨爲功於九江一郡而已

潯陽雜詠

府東少北濱大江北有小孤山在江中江濱有彭浪磯與小孤山對東北有馬當山橫枕大江有馬當鎮西南有峰

山磯鎮 明史

彭之爲邑東接池陽復籌崇岡夙稱山國而且孤懸江表
巨浸攸匯浩瀚無垠殆兼擅澤國之勝矣 黃雲師實紀

繡錯吳楚水陸舟車往來繹絡 同上

西據彭蠡北跨海門前拱文筆之峰右繞小孤之水形若
環椅勢如聯屏江右咽喉之邑也 明一統志

山川

小孤山

海門第一關 宋高宗篆額

山在水中巖然獨立 歐陽文忠公歸田錄

碧峰巉然孤起上干雲霄已非他山可擬愈近愈秀冬夏

晴雨姿態萬變信造化之尤物也 陸游小孤山記

延攬萬里宏納百川 夏文愍石篆

小孤峭然隻立不可攀援如卓天之筆出水之葉 戴國士序

小孤亭亭自立如筍籜之萌如華不之注遙泛者疑其與
波上下隨風傾欹不知上之安然有樓閣亭榭也 丁孕乾小孤說

高窮於丈週遭里許孤峰聳削中立大江爲吳楚關鎖亦

名中山 僧寶慧山記

一夫當關萬馬莫上惟其孤立不呼友朋故足畏耳 王思

訓小孤解

江自西南來過山擘之分爲兩激怒吼哮山首西南向略

一北轉爲稜故水北瀉而山下則爲急湍所不及反受回

流焉

朱書小孤山記

爾其毓質堅凝賦形孑立望巨浸以當關聳天表而奕奕
惟岷源之道江衝巫峽而盪激吞蠡澤以包湘沅歷柴桑
而東匯倏焉扼驚濤而鎮之如行兵之出其不意

高乘皇賦

突兀嶮峒一柱直插天半

遲大魁志引

山立大江之中無所倚薄

小孤圖說

舊連北岸江流循南岸而下兩山相列如門海潮至此而

盡

同上

壁立大江中一名髻山取其形似髻也

通志

小孤山距縣北五里許壁立千仞江水分流其下激湍狂
瀾舟人相戒如峽江灑灑揚子金焦

舊志

浩山在縣東九十里界連彭陽建德東流三縣唐李大亮

擇彭山之高者莫若此因浩山而立浩州後廢

通志

浩山脈自池之九華山層巒疊嶂秀拔雲間縣治諸山之
障彭澤第一峰也山腰有石如船其嶺有田三塢約五十
餘畝泉流不竭最上有大黃尖俯矚六邑山之東南爲太
平鄉西北爲黃菊鄉後割黃菊入東流而浩山遂爲東南
封界宋劉伯五修仙於此煉丹池飛昇臺遺跡現存

舊志

遊龍山在新興鄉西連武山東接浩山延袤百里縣南屏

障

鳳凰山在城內西隅狀若鳳凰奇石陡削壁立千尋建學
宮於其下又名西山山下有讀書巖潛玉洞

丫髻山在城內東隅兩峰並峙如髻故名

觀音山城外東北隅元至正元年建觀音閣

帽山在縣治東三里脉自六山平鋪十里特起高聳爲縣治華蓋一名雙峰尖寺觀軒敞竹木蒼蔚門望小孤儼若三山並立

橫山在縣南三十里五柳鄉下有橫山港

石壁鳴山在五柳鄉羣峰擁翠負北抱南茂竹佳茗爲禪林稱首士夫多往遊焉

石壁山在橫山內峰巒秀聳形如削壁水遠其下四時不涸山有玉壺洞高七丈深三十丈泉流不竭一名仙人巖宋時縣僚祈雨有客題一絕句見古蹟內中有香爐山其

下爲青山湖

武山建安鄉爲西南巨鎮屹然並廬山夾鄱湖而峙根盤數十里上有茨菇池池畔有寶華寺昔沈覺顯煉丹於此山自三縣峰由絞車嶺綿亘而北三縣峰者南屬都昌西屬湖口東北隸彭澤其陽有小桃源近筋竹澗傍有葛洪真人壇源側有雲峰雲出則雨東北隴口爲黃家菑山谷幽邃

黃漿山在縣東南四十五里疊石如瓮上下有二洞深遂

莫極歲旱祈雨輒應

通志

宋黃鵬舉詩清泉澈底瑩無泥

喚作黃漿恐未宜若見洞仙還寄語佳名當喚碧琉璃嘉慶辛酉邑人貢生項鸞建青雲書屋於其旁遠近之士咸

肄業焉

望夫山在縣南六十里世傳昔人從役不歸其妻每登此望之故名

六山在縣南五柳鄉以聯絡六峰得名

陶王山在縣東新興鄉下有祠祀長沙王陶侃故址猶存筆架山在五柳鄉上有石如筆架

龍山在縣治東南三十里梁蔚文光修煉之地松壇石室丹竈遺跡可考

李棚山在縣東四十里

天鳳山在八都高坂寨

倉鼠山在縣治東北六十里太平鄉上連大嶺岡古名蔣

家灣

仙跡山在縣南三十里上有巨人跡

馬山在八都高坂寨下有二洞可容二三十人泉出不竭

潺河山在縣東六十里

大鳴山在遊龍山北衆石崖巍羣木蒼鬱四時澗水飛流注石有聲如雷與大鳴山相峙者爲小鳴山

曉石山在縣東一里環山皆蜿蜒而此峰獨秀拔日出先有光

柏山在縣北六里山多柏木本山有洞名柏山洞

馬當山在縣東北三十里其山象馬橫枕大江烈風鼓浪行舟險阻邑人爲之立廟其嶺有虎石天井諸勝

鏡子山在縣城西北隅南接西山北瞰大江石峰嶙峋嵒
有圓石其光如鏡

鐵鑪山在縣西五里森嚴可畏下有磯水勢洶激舟行甚
險獅子山在鐵鑪山下

定山在縣西南三十里五柳鄉晉天福元年有羅漢現此
因建定安寺於其下

獨尖山縣治東北九十里突兀奇峰層巒聳翠與帽子尖
對峙

船山在大泊湖東其山有上中下俱若船形

白干山在大泊湖東山皆白石故名

鵝峰山在五都孤峰突起林木陰翳中有僧舍

西峰尖山在四都

嶽山在縣北四十里雙峰聳峙於大泊湖中合瀼溪山林

二水匯於山麓

彭城山在縣治東有古城相傳彭越逃此

寶珠山在縣治東五十里上有石如鏡

虎形山在縣治東北六十里老鵝冲內形如猛虎下澗其
尾麗天望之儼然可畏

四角尖山在縣治東北七十里蜿蜒綿亘爲浩山發脉遠
望之有四峰豎立秀色聳拔

龍洞山在九都豐科洞深九曲有石肖人物器用等形不
可勝數

席帽山在九都喬亭濂溪祠對面山形似帽勢若簪纓

義塚山在縣城北郭外北壇上高至頂脊下至平地一塢兩培盡屬官山爲寄籍併無貲者多瘞於此

東嶺在縣治東了髻山相聯晴嵐一色大江波濤舉目皆

見東南二嶺生員姚俊捐修

南嶺在縣治南與鳳凰山相接一路石磴如層階疊級

發洪嶺在縣東北五十里接浩山岑樹木森蔚下有洪水

東流北會香口入江

河埠嶺在縣東三里

黎坑嶺在縣東新興鄉十二都

羅衣嶺在縣治東北六十里桑園南後山層疊天矯獨突

一嶺平圓氣結左環帽山右拱三台相傳有雲祥老者乘馬其上

長湫嶺在縣治鳳凰山後

石峰嶺一在縣南三里許一在縣東五里許嶺脊俱有涼亭在縣南者鑿石有碍龍脉明崇禎時蔣勵修署縣事禁止打石馮節婦王氏以石峰獻之石鐫官山界三字餘仍王業

站前山嶺在舊縣南元時置馬驛於此

棗嶺在高坂外

黃茅嶺在高坂

望梅嶺在高坂上有古梅一株

石嶺在三都石塘冲上高龍腦縣治北二十里爲馬當諸山發脈之所

梧桐嶺在縣南百里

鮑家嶺在縣南八十里建安鄉宋姚興墓在焉

瀉油嶺在縣南九十里接武山

峽石嶺在縣西南四十里建安鄉

望官嶺在縣東南五十里

東龕嶺在縣東四十里

計家嶺在縣東五十里上建有亭

梅嶺在縣東七十里嶺東屬建德界嶺西屬彭澤九都

臺嶺在四都嶺邊有大石方正如臺昔傳仙人弈棋於上

安居嶺在縣東七十里上有巷亭通徽饒大路地與嵐嶺接壤

嵐嶺九都太平鄉嶺下張姓族居中有蓮岫席帽雙橋兩溪之勝

僊真巖在建安鄉石門五丈裂峙東西巖上蓮數朶垂綴石帶中清流下滴蓋奇觀也漢建興五年五日僧丹石於此修煉飛昇所由名邑人何文學詩聯云花飛佛座供蘭麝泉落僊巖響珮環

白龍巖在眞如寺西洞壁崔嵬四面峻石高三丈許巖中穿孔上透碧落孔傍石蓮森森巖畔有石叩如磬聲相傳沈覺顯煉丹於此其石床遺跡尙存

僊巖在觀音山後石壁玲瓏

僊人洞在四都葉家山張鳳題水月壺天四字刻於洞巔
上建有菴本山又有柏山洞

龍洞觀音閣前十餘步石裂罅一尺許高百餘丈仰窺天
漢若銀河一線

垂魚洞在縣西南八十里深遠莫窮有石魚懸於洞內又
有石橋棋局石乳玉壺之異

神安洞在縣西南五十里去玉壺洞三里山環水繞宋進
士張夢祥夢與五神人同遊息於此因以名焉

黃漿洞在李柵山嶺洞高十丈闊五六丈上懸石狀如龍
頭鬚角宛然崖左白泉傾注如練下二石水從中涌色如

漆萑葦隨溢說者謂與江通昔有禪者辟穀日飲黃漿詩
見黃漿山內

巖山洞在石壁山東五里藤蘿掛門幽深不可測

神仙洞在縣北郭觀音閣側相傳爲沈覺顯修煉處

化龍洞在六都操家冲形似龍口中有石棹石箸石杯上
有石樓并鐘磬等勝

澎浪磯隆起江濱長江自孤山直衝磯下波濤澎湃與孤
山對峙號海門第一關

烽火磯在小孤山下壁立江濱遠望之其峰如火故名

鍾子磯在縣西江濱形勢峻聳與鐵鑪山並立

仁磯在縣西三十里宋進士張夢祥隱此釣月處

蝦蟆石磯在縣治西二十里

峰山磯在縣西南三十里下臨大江舊有峰山磯鎮

馬當磯去城三十里在馬當山懸崖削壁俯瞰江流奔湍洶湧無風怒號夏時潮漲水勢益驕巨浪浮空約高數丈舟行最險非有筏纜扳援不能逆流而上且多顛危不測之虞鎮士商同捐費置買陸地共七號計五畝六分冊立馬當磯名每歲取息納糧買纜懸挂以便利涉垂諸永久梁石在九都四甲呈霞山巔石碁局上梁一石中空鼎立兒童以手探之碁子撥動有聲而不能取出俗傳仙人下碁處

青螺石在讀書巖前上有青螺字古刻

碗石在九都豐科港內九石突兀其狀如碗容水參差排列

磬石在讀書巖下扣之有聲

獅石在九都呈霞山巔形狀如獅口開處可容數十人上下齒牙嶙峋喉穴深丈餘

鐘石在小孤梳粧亭後非之清越如搏鐘然俗傳他山飛來

麻姑石在縣南五里

鼇石在四都溪邊有二石狀如鼇雍正年間雷雨徙去其一石尚存

貓石在縣東北六十里女兒橋港中高丈餘頭尾身體俱

全作九都一川之鎮

蝦蟆石在城北觀音山下

鏡石在筆架山上光現卽雨

邈邈石在縣東帽山南

濤石在讀書巖前石若波濤

堆雲石在四都守安湖口石峰突起丈餘有夏雲之態

寶珠石在發洪嶺內大石分列斜枕溪畔中有圓竅八九

左右徑圍相符世傳神人劈石取寶

鏡子石在十二都鏡子嶺縣南四十里其上巉巖峭壁約

高數十丈如鏡空懸光可照人中有丹桂一株可望而不

可攀花茂必主鄉會聯翩之兆

浮雲墩在方湖口週迴三百步隨江水漲落墩址如故又
名芙蓉墩

曬網墩在縣南十里

篁岡墩在縣西二十里

月山墩在篁岡墩左湖水泛溢墩浮如月

牛皮墩在縣南二十里與月山墩相對

馬公墩在縣東三十里

遊奕墩在遊龍山下

獨山墩在縣西十五里

印墩在縣南嶺下其形如印

龍船墩在守安湖中形如半月湖水泛漲其勢若浮

大江舊名潯陽江上流五十里至黃茅潭接湖口縣界下流六十里至香口鎮接東流縣界

仰天池卽大江西遇水漲一支西流毛湖洲一支東流合於江水落則流入馬當江

黃土港在縣南十五里爲方湖分派

官橋港源分二道一自閔家橋一自赤土塲兩水匯於橋下入江

張家港在縣西二里

長港在磨盤洲

母鯉港在縣南十餘里元李時因母病思魚冬月間時得鯉遂愈母病

女兒港在縣治東五十里收雙溪桑園二水經瀼溪達香口入江

新橋港在舊縣治源自李柵寨來

筍箕港在潦洪口水自武山瀉油嶺富香山來

安樂港在縣西南三十里

大港在縣南四十里

胭脂港在縣治北里許遇江水漲南北水注入可容舟楫梅家港在馬當山左

波斯港在縣治蛾眉洲

山林港在縣東三十里源出藜坑嶺支流入大泊湖

瀼溪港在縣東三十里源出浩山北經香口入江其水泛

漾而清深

雙溪港在縣東五十里太平鄉經山林灑溪達香口入江
清潭港建安鄉發源三縣峰北爲潦洪之源水匯方湖

深井港在縣西南三十里

方湖在縣南十五里週迴五十里許深井楊塘新橋等水
俱會於此

太泊湖東南爲青山湖在縣東北三十五里廣百餘頃陶
王山浩山水俱會此至香口入江

會口湖在縣磨盤洲接生會口東至東流縣課洲西南俱
至本縣課地北至本湖出水溝週迴十里

麋子湖在深井西南

靠牌湖在蛾眉洲

橫磯湖在縣南三十里水漲自大江而入通張家港會流
縣前磯有巨石橫立流側

守安湖在四都大泊湖東

天井湖與沈灣湖俱大泊支流

周家湖在縣北二十五里大江之濱

龍潭在五柳鄉龍山下

古樓潭在新興鄉

清水潭在縣西四十里水清多魚

陶潭在大泊湖東金潭在大泊湖西

毛湖潭在毛湖洲

烏石潭在發洪嶺下

響水灘在九都濂溪祠右側三里許兩山相合石磴橫攔
流泉下瀉響徹雲霄

迴澗溪在九都濂溪祠左波流湍激澄澈可鑒

柳洲在縣城外西北上自鏡子山下至小孤泖楊柳蒼翳

青連十里 弓步見卷五

乾隆十八年買受陽安都盈字號洲地叁拾畝南至官湖

北至橫路東至官湖西至胭脂港

明邑人丁湛記彭澤九江屬邑也去郡城百里而遙環山
爲治獨缺其西北而江走其下正統間江稍稍北徙而江
之故道淤而爲洲柳生其上以數萬計隱隱穠鬱適當缺

處而內與山接殆若造物者之有意爲此以補其缺也自
是邑之民物康阜而人才亦漸異昔說者以爲風氣完固
使然其後也長吏無良民縱竊伐其地遂成荒墟而屬之
民無復舊觀矣邑之大夫士欲復此久矣而力未能也會
巡按五台侍御所至觀風問俗汲汲民隱至九江民有以
復柳洲事白之者乃行雙江憲副議雙江慨然曰此吾事
也議上與巡按意合遂下令復其地歸之官而以課民植
柳委之知縣謝彩鳳主簿林貢民喜有是令也爭先從事
各以柳至植之不越月計凡三萬有奇適春雨彌旬柳盡
活無損望之蔚然若宿植者大夫士樂其事之有成也相
與謀建亭樹石將以垂之永久俾勿壞或曰無以爲也夫

思其人不忍傷其樹此人情也甘棠之詩其亦可以觀矣
今茲柳五台雙江之甘棠也且其興復經畫之勤非止一
憩而已而民何忍傷之而又何以刻石垂戒爲也余曰不
然賢者異世而同符子以今日封植之跡擬諸古昔似矣
若夫凡民古今固不相及子能必後之民能若南國之民
乎且前事殆可鑒已是固不可不蚤計而預爲之圖也盍
亦仰述上之人起廢之功而示之衆俾有所感且嚴爲之
約而申告之今而後吾民於是洲也無放牧無侵耕無以
斧斤入有不如約者衆聞之官而置之法無縱如此則是
洲之永存不廢或可幾也其不然者禁弛民玩將若前之
所爲吾見興復未幾廢隳隨之矣將不負上之人今日愴

惓之至意耶此其樹石垂戒殆不可以已也衆皆曰然遂
書其事刻之石侍御姓徐名紳字思行直隸建德人憲副
姓名濂字以清浙江新城人俱辛丑進士二公生平節
行及其勳跡赫赫不可蓋者他日史氏當特書茲不詳及
云

國朝知縣李松泰復柳洲碑記

今上乾隆元年督撫監司諮訪應行應革事宜以襄治理
維時彭澤縣署知縣李松泰首以彭邑柳洲歸官便民爲
請松泰按彭邑環山爲治獨缺西北而江流其下明正統
間大江北徙江之故道淤而爲洲生柳萬計適當缺處自
是祝融不灾人文蔚起而形家以爲風水所致理或然也

明嘉靖間被民侵耕而地勢卑窪不宜禾黍江水暴漲卽成巨浸旋復歸官令民植柳邑紳丁湛復洲有記勒石正覺寺中並與衆約無放牧無侵耕無以谷斤入有不如約者衆聞之官而置之法衆皆稱善洲納蘆課銀拾壹兩向例由官輸冊編荒日盈三字計七號戶名則彭官馬啓爲其賦出於官而其地遂爲官民芻牧之所也

國朝康熙三十年以後柳株摧枯且盡雍正間前令以賦無所出有生員張道岸書役趙鉉陽新元輩倡爲承墾完課之說凡遇民間牲畜一入其地卽藉口踐食青苗橫索重償大爲民害今乾隆二年闔邑士民請復歸官照舊植柳以培風水以便芻牧松泰爰得請於列憲議下藩司時

布政使阿公蘭泰議得彭澤縣郭外沿江柳洲旣經府勘地處沮洳不宜種植况官民久便芻牧承墾未經報部陞科而課銀又係該縣捐輸自不便仍令豪強藉估滋事應如該府縣所請將各戶所墾之地退出歸官聽民栽培蓄牧其官捐課項請歸丹江虛糧之內一體開除仍飭縣勒石永遠遵守取具碑摹送查俱報可於是松泰勒其事於石志憲德也又慮日久專遷乃就洲築三賢祠而以其右爲義學命曰柳洲書院松泰捐廉倡首而邑士民之好義者襄厥成焉是役也事由創始其一切規制均有未備若夫羣生徒而肄業聘名儒以至席庖廩有資程課有法則柳洲之關係文風尤勝於形家之言此松泰所未能謹俟

夫後之蒞茲土者

闔邑碑記吾彭古邑也徙自南唐環山爲郭峰有雙童丹鳳之名水有彭蠡方湖之秀形勢亦旣美且勝矣特西北臨江缺少屏障朔風怒號輒入迴旋居民之房舍不安山川之旺氣日洩祝融爲患流毒靡涯正統間北郭江道淤爲洲地柳生其上屏印江干一時洲爲官洲柳爲官柳青葱綠翠蔚然盛矣邑士民咸攸賴之未幾禁弛柳廢侵佔日生空曠之形依然曩昔迨嘉靖間荷邑之先達丁忠諫公力任興復商其事於巡按徐五台公檄縣清澄招民植柳仍復舊觀前碣昭然厥後邑宰壘相培護二百年來幾幸永保無虞矣不意雍正初年復有謀利之徒竄惑前縣

借端墾土伐樹使千年之勝境掃地闔邑髮指雖有紳士委曲求復因案經詳定夫允所請柳洲復敗至此極矣丙辰歲北平李公蒞任初按閱縣治憫民無牧芻地因訪此洲之源委酌利害之重輕亟爲請命鼎力申詳民隨上瀆蒙前撫憲岳批司查議允准飭押矜臺等退地歸官依舊植柳勒碑取募在案崑刻現存無庸再贅而公猶爲深謀遠慮恐簞久弊生復遭侵伐乃捐貲倡首士民亦皆樂助卽於柳洲創建賢祠右爲書院爲是洲久遠之計吾知棟宇非徒壯觀臺榭足以補缺較向時之徒植柳於洲者不更有加哉噫斯舉也迴狂瀾於旣倒挽流害於已成非懷父母之心而具山嶽之力者曷克臻此將見甘棠之蔭

並柳色以長青愛育之恩等孤山而俱永矣爰序其事而爲之銘曰柳洲鬱鬱風氣攸關代作屏障補缺爲完殘毀已極復興實難我公神宰力砥狂瀾歛手歸地折屈貪頑穠蔚相望輝山媚川締造在昔紹盛茲年功垂奕世德婉三賢

邑人歐陽晟記彭澤別號柳邑緣五柳先生而名也邑三面環山惟北獨曠每值朔風怒號而居民大厲幸淤漲一洲先代插柳其上補完缺陷一以存陶公遺愛一以作縣治北障俾民得安堵焉明嘉靖間邑無良牧縱民踐伐幾成荒墟旋蒙按憲徐公副憲方公嚴加禁護斯洲得以安至今百有餘年矣孤山丁先生序其巔末最詳其倦倦爲後世慮者猶歷歷可考也

國朝雍正甲寅又有啓議開墾之說將欲盡前人之手澤而斬刈之曾不思一邑保障萬家烟火關係甚鉅也幸謀未竟而事未遂小往大來傾否成泰邑侯李公蒞任茲土甫下車接見縉紳士大夫輒以邑之利弊周謀咨諏余亦諸君子後竊以柳洲一事爲要欸相與剴切詳明以告尤藉諸君子扶助之公見詢謀僉同遂憤然起毅然任申文各憲永禁開墾插柳其間且捐俸率屬築堤建祠祀先朝名勳賢宰更勒爲柳洲學額附塾芥重二字號洲取息爲修葺膏火資著冊載石以志不朽至今霧鎖千絲烟籠萬縷鶯啼春雨馬踏秋風都人士咸頌公之甘棠於勿衰云

公諱松泰號介石直隸北平人

知縣何炳奎云閱志載柳洲碑文林立訪之邑人僉以此洲係邑最重緣當時有議墾此洲者藉名承課官不之察而邑受其害矣自乾隆戊午課項開除自是永無此患今二十年人頌李令之德弗衰後有復議墾者當嚴加勞斷慎毋蹈長吏無良之剝也

舊志

又按三賢祠及柳洲書院之建李令可謂知政矣而歷承李令者未見踵行夫設義學儲人才正守土者之責古之循吏者固不在簿書鈎考之能也閱碑載柳洲學額李令附塾芥重等字號洲取息以資膏火及修葺是前人已有益規矣不知李令去後此洲學額之資惡

在一邑之事當爲一邑共成之

本朝百餘年來彭之稱循吏者六人李令其一宜哉

舊志

得勝洲在縣西五里明太祖征陳友諒首捷於此又名謝

家洲

毛湖洲在縣北元末繆將軍克襄陽領毛湖蘆軍奏捷駐舟於此繼聞旨還守襄陽故名

蛾眉洲在江北岸水涸中有一港細曲如眉下爲楊家洲西北爲龍船洲北爲磨盤洲東北爲葉家洲西爲張秀洲楊葉洲其上多楊柳洲以西屬彭澤東屬池洲省志云卽柳洲謾

鴈來洲在縣北四十里水涸鴻鴈羣集又傳安慶趙雙刀

夜泊舟於此得陳友諒鴈傳僞信雙刀死而友諒亡洲東爲白沙洲

新洲在成化間洪水涌沙而成自得勝洲接遠縣前直抵小孤汛又名汪家洲

重字號盈寧洲在小孤山下柳洲學一股原額共地壹百叁拾頃畝 草地捌拾肆畝 草坦伍拾壹頃畝沙灘柒拾頃壹拾陸畝 泥灘捌頃畝 東至珠字一號分水今至石墩西至大江今至淡字號南至大江今至重字二號北至同三號 長貳千肆百弓廣壹千叁百弓積叁百壹拾貳萬步計壹百叁拾頃畝原額課銀捌錢肆分十九年大丈變則增課銀肆錢共壹兩貳錢肆分後變則增課

銀五

又重字二號洲 同上

東至光字分水南至大江西至大江今至淡字號北至重字一號

蕭老洲在邵壁夾湖上

余家洲在馬當磯對岸

龍潭口溝下洲在草場湖西

芥字號泰興洲在余家洲上柳洲學一半原額共地柒拾頃畝 草坦壹頃玖拾畝 沙灘陸拾頃壹拾畝 東至大江西至水口南至大江北至金雲老峰 長貳千捌百弓廣陸百弓積壹百陸拾捌萬步 計柒拾頃畝 十九年大丈徵課銀玖錢 後變則增課 見卷五

乾隆十九年六月初六日署縣周千里 審得柳洲學新漲一洲係乾隆六年二月洲民張錦盡劉萬乾等三十二人併柳洲學之名報佃卽今之芥字號洲也業經詳報咨部墜徵此洲原因興復柳洲義學待洲蘆茂以資膏火故有柳洲學之名十八年劉萬乾等報僉洲頭以承局丈詎有原報無名之張景三串通監生葉以任等混爭滋訟本署縣查案集訊將芥字號洲斷作二股一歸柳洲學一給原報之佃均分每年拊蘆之時議明蘆價同客赴縣報明給照方許砍蘆柳洲學一股之銀繳存縣庫以備興復義學之需取具劉萬乾等不違遵依附卷永斷葛藤嗣後原佃等如敢私拊舞弊將洲盡行歸公斷不稍貸也立案

流城洲新生湖澆

蔣家洲波斯港北

炭洲在流城洲西北皆正德嘉靖間水沙相涌而成

夾洲在二十都

小孤洲與小孤山相對

魏家洲在蛾眉洲

赤泉在縣南一百里五柳鄉泉赤冬溫夏涼四時不涸灌

田可百餘畝

石井在長樂坂有流泉雖大旱灌田不竭

木橫井在縣南六十里深廣丈餘灌田百畝

冷井在六都曹冲口

煖水井在橫山湖東四時泉流温煖可掬

龍井在十二都井淺而狹其水夏寒冬温雖大旱不竭所

灌田以六日六夕一輪

丁家井在三都舊宅壩

猴冲井在二都鎮靈菴側久旱不竭

西峰井在十二都黃連礮叫名鴨子湖清泉時出

計家井一在城中計家巷內 一在四都七鳳山袁家灣

堰下挨身下邊又有計宜井一口

深井在縣南三十里

西湖義井在新興鄉耆民柯瑛鑿

水利

會田陂在九都陳坡坂灌田五百餘畝

新田陂在十二都新興鄉新田村灌田三百餘畝

永定陂在十二都新興鄉古樓坂灌田二百畝

社口陂在二十五都建安鄉竹園坂灌田二百餘畝

曹思陂在四都石龜源灌田數十畝

琉璃陂在九都中寨彭路三柱屋上首灌田五十餘畝

汪洋潭堰在四都灌田八十餘畝

石壁堰在七都五柳鄉石壁山口一支分灌橫山口田一

支分灌富溪橋田

凌家永定堰在六都固村灌田二百餘畝

永定堰在六都濃溪港灌田四百餘畝

胡家堰在九都

神山前堰在四都白馬山王姓門首灌田百十餘畝

陳佃堰

同上

蔣家堰在十三都灌田七十餘畝

劉家堰在二十五都

馮家堰在二坊灌田可百餘畝

丁陂堰在十五都夾田村灌田百餘畝

童家堰在長樂坂下灌田六十餘畝

東莊堰一名宮陂堰

高家小溝堰在二十五都灌田五十餘畝

梅林堰在四都發源四顧山灌梅林坂屯田百餘畝

楊家堰在七都大港口上接改磯堰灌田八十餘畝

蘆陂堰在媽媽橋大港口分流十餘里灌民田數百餘畝

改磯堰在七都大港口灌田七十餘畝

松林堰在六都黃荆坂灌田五十餘畝

西山堰在四都臺嶺源灌田數十餘畝

永豐堰在九都豐科

樂郊堰在九都藍家坂灌田二百餘畝

陽家堰在九都桑園門首灌田六十餘畝

石嶺堰在四都石嶺山下源發四顧梅嶺兩山澗水匯於

嶺下灌廬田三十餘畝

周家堰在二十五都法濟寺下邊大港灌田壹百數十餘

畝

柯家堰在二十五都周文滄港灌田三十餘畝

小陂堰在九都葉村坂朱祿二住屋上首灌田六十餘畝

陳陂堰在九都灌蔭陳陂坂田三百餘畝

官差堰在九都柳墅灌蔭塘沙坂田二百餘畝

孫家堰在二十都

華陂堰在四都七鳳山吳姓門首堰上井一口

楊家塘在十五都

觀莊塘在七都回圍皆山爲塋渚水於中灌田不竭爲彭

澤湖口西南之界

許家塘在三都

黃花塘在十五都

蓮花塘一在三十都 一在四都鷄壩

茨菇塘出武山上

八僊塘在太平坂

賈家塘在三都

泉水塘在七都何姓門首灌田百餘畝

大塘壩塘在四都三塘合一灌田五十餘畝

官塘在十二都寶良坂灌田百餘畝雖大旱不竭

丁稅塘在三都馬當鎮橋內

董家塘在一都

滾水塘在八都其水泛如湯沸

活水塘在九都東山街朱禮屋後灌田三百餘畝

清水塘在九都東陽灣朱禮墓右

馮家塘在北關外正覺寺側

縣境山鄉患霖雨湖濱患水溢八都九都十二都二十都二十五都皆崇山峻嶺溪流一綫港畔田地山環勢逼一遇洪雨漲港漫川禾苗盡沒雖涸可立待而漂洗沙壅所在難免此導洩之難也一二坊三四五六都暨三十都三十三都半濱江湖夏秋水漲瀾漫無際卽收成在望亦坐觀滄沒此堵禦之難也至平原吠畝全賴陂堰堤塘厚水澆灌然或勤惰不齊公私受困此疏濬之難也全在有土者平時亟爲勸諭臨事嚴加查察山

鄉之衆令其各就地勢堰塘灌溉堅好無滲洪雨則開以洩之晴霽則堵以蓄之濱水之地度可堵之區令築高廣圩堤以防水溢平原之墟濬塘築堰務期深固利賴非淺矣

舊志

風俗

壯者無取老婦老者無取壯妻女子十七不嫁父母有罪

丈夫二十不妻父母有罪

吳越春秋

士有陷堅之銳俗有節概之風

左思三都賦

荆楚饒勁士吳越多秀民

同安郡志

土俗輕揚

孔氏六帖

君子勤禮恭謹小人盡力耕殖

祥符圖經

鍾地之氣者能文而多至性

小孤志說

土壤膏沃人性輕揚

宋史

灌畦鬻蔬爲供魚鹽之祭織絢緯蕭以充糧粒之資

顏延之誄陶徵士序

綴平臺之逸響采南皮之高韻遺風餘烈事極江右

宋書

謝靈運傳論

予嘗舟過彭澤挹五柳之高風

戴國士小孤舊序

地間山澤天行之災匪旱則澇十年之田而多有不償者

以故其民多貧

徐士儀言

過信珉輿不輕寗窳高曾之樞數傳而猶不砌

喻合實紀

溺女一事不知起自何人創自何代相習成風不以爲怪

同上

縉紳之禮繁山林之禮簡

王演疇家訓類編

山峻土沃俗尙文儀儒風相續民習經商婚媾侈裝送中
人之家多不育女舉葬作佛事親戚之家盛行祭禮婦人
事紡織

府志

人性堅貞習尙風雅山林之民力鋌基川澤之民業網罟
士尙文采多氣慨燕會以文交際以禮恥奔競而甘恬退
厭喬野而飾衣冠故急於功名聞望而喜見長務爲奇行
高節而羞不義

農務耕種兼漁佃田少力勤地沃資厚木棉可抵稻黍之
半山澤可補力田之餘但市塵酣飲鄉鄙好勝濱江者稍

虛夸近山者多切實

工習技藝尠奇巧業農之家兼事工匠職藝之子亦務耕
耘

商務販鬻賈坐鄉都事無專業利亦輕微寧老死不出其
鄉若贏餘卽安於室

冠悉逾時制

婚重親迎侈裝送貧素之家雅重財帛富厚之家多美觀
瞻新婦謁廟友戚拜賀欸燕豐隆

喪重棺木厚殮殯親戚弔哭送銘書軸但信任浮屠修齋
說偈亦成陋習而掩葬每致積訟停柩竟歷多年亦信任
風水之過也

祭以時祀於中堂清明奠於墓下

元旦雞鳴起肅衣冠焚香拜天謁祖次及尊屬各序拜鄉
鄰往來投刺出擇方隅取吉交饋以糒粿

立春前一日爲土牛掛綵裝故事縣正官率僚屬迎春至
期清晨鞭春磔土牛民爭拾之以爲得春

元宵邑民輪供燈會出有太子鰲山等燈畫紗縷楮炳燭
輝煌頗云巧艷爲之盛張鼓樂弛禁往來達旦
花朝邑人多行婚禮

清明先期各於祖塚沿山掛白具酒穀培土掃墓
春社各詣社壇祭畢鄉約宣講

聖諭聚飲而還

四月八日觀雨賜以占旱澇間用烏飯

端午以蒲艾懸門啖角黍用雄黃菖蒲和酒泛飲沿荆俗
屈原是日沉汨羅以舟救之因置龍舟競渡士民相率往
觀

六月六日相傳邑城隍生辰前三日掃道清塵臨期出巡
扮伯禽旗衛滿街結綵香案迎迓各街坊裝臺閣故事備
極精巧觀者盈市

中元俗稱鬼節各家設祭薦先夜則賑濟孤幽

秋社與春社同

中秋士民設酒賞月戲陳瓜玩

重陽士民登高插菊花泛茱觴以慶佳節

冬至民間設羹飯祀祖先名曰冬飯士大夫往來稱慶
臘月辦薪米索通錢嫁娶喪葬之事多歸此月八日合佳
菓米豆爲粥號臘八粥二十四日掃舍宇祭竈神次日迎
祖先

除夕設饌祭先各向尊長前途歲 以上舊志

古蹟

彭澤故縣城在都昌縣北四十五里晉陶潛爲令治此地
地理通釋

通雅陶令八十日之彭澤非今小孤前之彭澤也古彭澤
在今湖口縣東三十里漢置晉隋因之凡左蠡而北大孤
而東皆其地也唐武德五年改彭澤爲浩州遷於浩山下

今湖口九都號五柳鄉八都號彭澤鄉有三學堂祀淵明
有洗墨池玩月臺吳草廬爲記唐始析五柳彭澤二鄉之
地爲湖口縣若以小孤江之彭澤縣爲淵明解綬地則非
矣

澤陽縣志

甌月臺在彭澤鄉世傳晉陶淵明宰縣時築亭二臺一臺
卽此也又鑿洗墨池以滌筆墨鑿九曲池暇日與陸脩靜
周續之流觴而飲今遺址尚在有三學堂析入湖口境

三學堂在彭澤鄉晉陶潛與陸修靜周續之講論於此唐

天祐間改爲寺

明一統志

五柳館在彭澤縣卽五柳先生陶潛宅

同上

五柳堂在縣治東三十步元主簿馮克敏建今廢爲民居

讀書巖縣治東二十餘里陶王山西麓小塢中石壁有讀
書巖三字蒼啞綠巖中鐫畫凸凹尙隱隱可識相傳以爲
淵明遺跡石壁右百餘步有庵曰勝蹟蓋後人所作以祠
先生者

望雲亭在彭澤縣南一十五里唐狄仁傑宰彭澤奏赦犯
大辟者三百人民德之建祠立亭後人因取其望雲思親
之意爲名明正統九年重建

明一統志

七級浮屠在舊縣俗呼舊縣塔今猶存

白雲樓在狄公祠舊志云明宏治癸亥御史林俊謁祠命
知縣王琦建今圯

六必堂縣治東半里宋尉汪同叔以六善事自必因名元

彭澤縣志 卷之二
末兵毀

舊志

春風堂明洪武十一年主簿孔希直建於學宮爲聚講之

所今廢

舊志

迴堂西灣詩話云彭澤兵火中孤城俱燼惟劉觀欵迴堂獨存蓋巋然魯靈光殿矣固宜以迴名之觀欵石刻甚多板貯堂內豈神物呵護之耶潯陽蹠醢云觀欵先生刻有迴堂詩吳越吟詩泐諸稿

魯望亭在馬當山麓宋黃庭堅嘗登此眺望有四詩紀之

後人名亭曰魯望蓋以其字魯望故云

明一統志

馬跡亭在馬當山下唐太和中建今圯

舊志

半山亭在馬當山下唐太和中建今圯

同上

敬秀寺在小孤山後燬

小孤舊亭在山半宋江州守厲文翁築後圯更新改題曰一柱峰亭虞邵菴記云余觀其確特險壯曠然興懷足以納百川於足下覽萬里於一瞬泰然安坐而受之可以終日石級盤旋以上稜結堅纈關護完固登者忘其險焉蓋故宋江州守臣厲文翁之所築也今爲天妃神祠乾隆間燬於火總制高公晉重構之

高宗純皇帝

御書靈昭江嶼扁額

梳粧亭小孤山頂憑高眺遠極江天之勝俗傳小姑梳粧之所亭後石上舊有獨立物表四字及飛來石三字邑人

劉敞題雲香水翠四字僧霞觀鐫

鐵柱有二一在小孤山南麓臥沙石中一在彭浪磯龍津寺門首棊圖中客舟上下挽纜而過至今二柱現存

讀書巖古亭在儒學尊經閣後宋縣尉石振建巖上鐫讀書巖三字黃山谷書元王德淵吳草廬有記並見藝文六

角亭在彭澤治西宋縣尉石振構亭山巖下合其二子讀書黃庭堅書其巖曰讀書亭曰六角元吳澄有記明一統

稽古亭在讀書巖下宋石振建元焦良輔重修

一寄亭明教諭張一言建自記云予作六角亭於讀書巖下作一寄亭於青螺石下六角舊名也一寄新扁也二亭次第而成亦一時事也助之者我諸生也董之者周賞也

肖明嘉靖甲午春也巖上石刻尙存亭祀

敬一亭在讀書巖前明嘉靖七年建萬歷四十八年重立

今圯碑刻明世宗敬一箴并序並見藝文

二圖俱列敬一亭於讀書巖前今敬一箴碑刻尙在王
志謂在櫛星門左與縣圖不合 舊志

集賢亭在讀書巖下明萬歷間張磐建巖上石刻有詩并序云余蒞彭庠越月尋讀書巖黃魯直石興宗遺跡慨慕久之以諷邑侯孟公侯忻然爲亭遠拓前規噫山付有緣事垂不朽因志短韻聊紀歲月云爾時萬歷庚寅夏五仙尉闢書巖太史留名迹紹聖休櫛陰歷歷垂四百勝地幾共廢人心殊險易余來尋故壘侯悅董新役乘虛構孤亭

憑閣眺寒碧潛玉洞雲流集賢龕月白可與二三子能容
四五客焦華獻奇瑞甘露瀼瓊液喚起頻振衣催歸仍着
屐意寓山水間樂尋孔顏側不慕軒冕榮愈覺身心適真
想契前修撫景忘今昔後亭廢

國朝康熙間教諭彭濱復建今亦廢 舊志

介亭因介石名教諭歐陽德榕書額亭現存

西山祠在讀書巖側宋淳祐乙巳邑尉新安胡會龍建今
圯有石刻存

石鐘在讀書巖有石如鐘叩之鏗然有聲

勝覽亭在鳳凰山今廢 舊志

觀瀾亭在普明寺山石今廢 舊志

鐘樓在普明寺右明天順間知縣黃慶命僧會司圓悟建
鑄鐘其上與譙樓互司晨昏後圯

觀德亭在射圃內今廢 舊志

來鶴亭在縣廳後下有省躬舫遺二亭今廢 舊志

萬里江天亭在縣水驛前元大德間邑合曹靖國建今廢
舊志

栖賓亭在富陽山李中白隱處皮日休記云距彭澤縣東
十里有山遂源奧處曰富陽文士李中白隱焉木秀於芝
泉甘於飴霽峰倚空如碧色正鮮濃鳴溪淥淥源內橐籥
溝出琉璃液又有怪石名禽中白所尙皆古以時不合已
故隱是境今圯 得樹樓抄

唐興院東坡書太白集云予舊在富陽見國清院太白詩絕凡近過彭澤唐興院又見太白詩亦非是今舊縣東聶家山有富陽壠富陽嶺應卽其地但國清院彭澤唐興院遺址俱無存

一笑亭 綺練亭皆在彭澤鄉今廢

申明亭在縣署儀門右後圯乾隆三十七年知縣李鐸因舊址開署前向東北大路

惠民亭在西門外康熙三十年閭邑士民爲知縣端木象謙立嘉慶十一年邑儒士何自峰喬重修

仁磯釣臺宋進士張夢祥棲隱處

橘市在昔九鄉之內今無考 舊志

石浪山房在縣東嶺明水部喻以恕所構石如浪涌因名今址尙在 同上

觀音閣元至正間四月八日大雨雪雪花貼石壁現白衣觀音像因是建閣閣後石壁萬仞一石右開直立如笋高數十丈楚人洪一夔鑄有高山大川四字閣左有飛來鐘倚鐘側上石級數百步曰靈官殿殿右爲土神祠殿左石壁高處有塔塔下石上有詩字跡剝蝕依形求之得危磴千盤上青蓮絕頂開石侵苔殿小江豁雨風催孤興臨摹二十四字由塔下石級折而上爲祖師殿亦有塔塔內石上鐫有奇峰插天四字康熙初合邑重建嘉慶辛酉邑人職監丁世馥同徽州監生汪國琇四川舉人李天英復新

之鑿山磬石建小憩亭於其下右爲可觀亭亭下建關帝殿殿側築祇談風月精舍閣中鑿石壁爲普陀巖太守方茶山先生體行部至縣親書雪佛巖三字懸諸閣上每當風日晴和遊人登覽萬株楊柳綠上鬚眉大江中帆檣出沒而孤山一點秀出當門蓋備極江山之勝云

潛玉洞在讀書巖西洞前二石對立刻石門二字宋王自適記云中含萬怪深藏不市洞上有勝覽并第一峰白雲深處諸刻洞旁一石高丈餘廣半之上有窟積水不滲名窪尊下有君子池伏蟾石

觀音洞在二十五都石上有倒懸大士像洞中平坦可畝許旁小洞二洞後幽曲十餘里籠燭往遊異狀迭見

玉壺洞卽烏洞在仙真巖側洞深七八里水繞洞出遇旱導之可灌田洞石田數圻清流四時不竭洞中石壁有古刻詩云洞前流水碧如苔洞口桃花拂面開轉頭望斷意不斷長嘯一聲須再來又詩云十里扶筇秉燭遊信知仙洞異凡流我來不忍回頭去恐墜西山紅日頭

舊志

寅賓館在縣署儀門左今廢

舊志

九翠塔在九都梅嶺

李氏寶塔在六都南田坂李伯權建

天井坑在二十五都陽訓山水入山底委曲深邃出玉壺洞老山水入山底出仙橋洞橋當兩山谷口高懸數丈可通往來山石生成若天造地設者水從橋下石縫透出會

玉壺洞水於天井坑中復入山底穿山數重出石巖山龍
口洞三處皆方廣數里人烟田地如居幙內一遇洪雨水
出洶涌勢若溪河洶山水勝境也

縣前井縣治儀門外明洪武二年知縣黃安泰以邑多火
灾術者謂前山爲火星遂鑿井以厭之嘉靖十九年知縣
林時暘因民居不便於汲遷譙樓外後知縣朱公節開拓
後址甃石爲惠濟池

西峯井在廣福寺昔西峰禪師卓錫遺跡遇旱中有靈湫
溢出村民挹而禱之輒雨

洪真入井在縣南十里遇旱禱雨於此
天井在馬當山之巔

函玉泉在山川壇左泉脉自山頂層崖石孔透出四時清
瑩人多掬飲以愈疾上有石刻函玉泉三字又名冷水澗
象鼻泉在大鳴山寺後巖石如鼻有兩孔深約二尺廣如
之孔中甘泉時出雖旱不竭

龍井在浩山早取水禱之則應劉伯五爲蘇州府尹大旱
禱不應乃歸取水浩山應時而雨遂悟道隱於茲山築庵
居之庵前有水曰東溪溪有石曰橫欄嘗題詩鐫石上云
職任蘇州府尹官歸山慕道便神仙大航尖上天梯近龍
井池邊法水潛遍地藥材千百味仰天湖水二三川詩題
一字橫欄石永立東溪不計年今石被水衝崩仄字覆其
下不可見庵尙存劉氏世奉之

莫忘井在縣治南五十里陞官嶺北望梅嶺南明太祖征友諒時師行過此渴甚無水太祖以劔鑿石清泉湧出衆皆喜曰莫忘此水因名

八景附詩並見藝文

書巖擁翠

仁磯釣月

觀閣流霞

柳洲凝霧

雙峯霽色

孤柱濤聲

方湖漁唱

玉洞仙遊

補遺

春衣書院口字三號洲坐落縣前洲濱江東至月盈稱景老耷真下西至大江南至獅子山大江北至小孤山長壹千二百弓廣貳百壹拾弓積貳拾伍萬貳千步計拾頃伍拾畝內草地拾伍畝課銀壹錢伍分草坦拾畝泥灘肆頃畝沙灘陸頃貳拾伍畝外喝計水影沙灘柒頃畝皆例不科

馬當磯嘉慶二十四年邑人汪永芳捐錢拾千文監生項元捐錢拾千文監生倪文林捐錢五千文監生倪懋林捐錢貳千文皆存公生放以補買纜之費

鐵爐山知縣周巖禁開鑿告示爲嚴禁開山鑿石以資保障事照得彭邑濱臨大江波濤澎湃有獅子等山環其西北鐵爐諸山繞其東南各抱地勢於是環山爲城遂成都邑民乃奠居烟巒屏列萬家之烟火迴環文筆高撐一邑之文風蔚起觀音巖鍾靈佛地近接小孤鏡子山疊聳巒光遙迎五老非獨千秋之名勝實爲一縣之藩籬理宜保護山靈題碑勒石何得傷殘地脉弄斧運斤茲據職監周之泰生員周起瑞等稟稱鐵爐山一帶有數十人起厥居住鑿石毀山呈請查禁等情據此飭差查明外爲此示仰合邑軍民人等知悉爾等閭閻聚族共樂安居雖山川名勝之奇鄉愚莫曉而風鑑地師之說流俗咸知豈宜鑿石

挖山希圖賣錢獲利嗣後凡前項名山以及周圍縣治諸山無論屬官屬民只許樵採安葬毋得取石毀山自示之後如有不法之徒敢仍蹈前轍一經訪聞或被告發定即拿縣重治懲究地保居民知而不舉亦併究治決不寬貸毋違特示

